

- a) standardna uredska radna stanica;
- b) poboljšana uredska radna stanica;
- c) napredna uredska radna stanica;
- d) mobilna radna stanica;
- e) napredna mobilna radna stanica.

Opis, podjela, način korištenja i osnovni elementi radnih stanica propisani su važećom Odlukom o radnoj stanici u Kantonu Sarajevo.

III (Konfiguracija)

Konfiguracija računarske opreme mora zadovoljiti minimalne tehničke uslove kako bi zaposlenici kantonalnih organa mogli što efikasnije obavljati svoje radne zadatke i obaveze i razmjenjivati informacije i podatke s ostalim zaposlenicima, partnerima i javnošću.

Ukoliko je postojeća konfiguracija manja od minimalne, a računar star do 8 (osam) godina, po mogućnosti se dograđuju komponente (memorija, disk, čitač diskova i slično).

Umjesto računara čija je konfiguracija manja od minimalne, a računar stariji od 8 (osam) godina, nabavlja se novi računar prema standardnoj konfiguraciji.

Odabir diska se vrši prema očekivanoj količini podataka koja se pohranjuje na disk.

Raspodjelu računara vrši kantonalni organ prema zahtjevima radnog mjesta.

Sve radne stanice u kantonalnim organima moraju zadovoljavati minimalne tehničke zahtjeve koji se odnose na hardver, odnosno procesor, radnu memoriju, tvrdi disk, eksterne priključke, monitor, tastaturu i računarski miš.

IV (Centralna jedinica)

Minimalne hardverske karakteristike za radne stanice u jedinstvenoj mreži kantonalnih organa su:

- Intel i3 procesor (generacije na kojoj stabilno radi minimalno Windows 10 OS) ili sličan (brzina, keš memorija, broj jezgri i slično);
- 8 GB RAM memorije za rad 64-bitnog operativnog sistema;
- RJ45 mrežni priključak.

U Tabeli 1. se nalaze važeće hardverske karakteristike osnovnih kategorija radnih stanica:

Tabela 1.

Naziv	Standardna uredska radna stanica	Poboljšana uredska radna stanica	Napredna uredska radna stanica	Mobilna radna stanica	Napredna mobilna radna stanica
Procesor	Max Intel i3 ili ekvivalent (brzina, Cache, broj jezgri)	Max Intel i5 ili ekvivalent (brzina, Cache, broj jezgri)	Max Intel i7 ili ekvivalent (brzina, Cache, broj jezgri)	Max Intel i3 ili ekvivalent (brzina, Cache, broj jezgri)	Max Intel i7 ili ekvivalent (brzina, Cache, broj jezgri)
Memorija	Do 8 GB s mogućnošću nadogradnje	Do 16 GB s mogućnošću nadogradnje	Do 32 GB s mogućnošću nadogradnje	Do 8 GB	Do 16 GB
Tvrdi disk	Do 1 TB (opciono)	Do 1 TB (opciono)	Do 2 TB (opciono)	Do 1 TB (opciono)	Do 2 TB (opciono)
SSD	Do 256 GB	Do 512 GB	Do 1 TB	Do 256 GB	Do 1 TB
Priključci	USB, serial, parallel, 100/1000 Eth. HDMI (i drugo opciono)	USB, serial, parallel, 100/1000 Eth., HDMI	USB, serial, parallel, 100/1000 Eth., HDMI, Wi-Fi	USB, integrated gigabit ethernet, HDMI, Wi-Fi, Bluetooth	USB, integrated gigabit ethernet, HDMI, Wi-Fi, Bluetooth
Monitor	Do 22" Flat panel	Do 24" Flat panel	Do 28" Flat panel	Do 15,6" s integrisanom kamerom i mikrofonom	Do 17,3" s integrisanom kamerom i mikrofonom
Tastatura	USB B/H/S/ENG tastatura	USB B/H/S/ENG tastatura	USB B/H/S/ENG tastatura	Internal Keyboard (lokalizirana)	Internal Keyboard (lokalizirana)
Miš	USB 2-button mouse	USB 2-button mouse	USB 2-button mouse	Integrated Mouse Touchpad	Integrated Mouse Touchpad

Zavod za informatiku i statistiku Kantona Sarajevo (u daljnjem tekstu: Zavod) je obavezan jednom godišnje izvršiti reviziju i objavu važećih hardverskih karakteristika osnovnih kategorija radnih stanica.

V (Operativni sistem)

Radne stanice u kantonalnim organima opremljene su operativnim sistemom nabavljenim na osnovu ugovora s proizvođačem ili ovlaštenim dobavljačem, osim u slučajevima kada takav operativni sistem ne može odgovoriti zahtjevima koji su postavljeni za izvršavanje određenih poslovnih procesa i aplikacija za čije korištenje odobrenje donosi rukovodilac kantonalnog organa.

Operativni sistemi se koriste sve do datuma do kada proizvođač ili ovlašten dobavljač za njih osigurava sistemsku podršku.

Nije dozvoljeno korištenje operativnih sistema za koje proizvođač ili ovlašten dobavljač ne pružaju sistemsku podršku.

VI (Mišljenje Zavoda i nabavka opreme)

Kantonalni organi su obavezni za novu računarsku opremu, prije nabavke, pribaviti odgovarajuće mišljenje Zavoda o usklađenosti s ovom Odlukom i važećom Odlukom o radnoj stanici u Kantonu Sarajevo.

VII

(Prestanak važenja ranije odluke)

Donošenjem ove Odluke prestaje važiti Odluka o hardveru radne stanice, broj: 26-02-523/23 od 10.01.2023. godine, objavljena u "Službenim novinama Kantona Sarajevo", broj: 3/23.

VIII

(Stupanje na snagu)

Ova Odluka stupa na snagu danom donošenja, a objavit će se u "Službenim novinama Kantona Sarajevo", na zvaničnoj internet stranici i na oglasnoj tabli Kantona Sarajevo.

Broj 26-02-11212/24
13. marta 2024. godine
Sarajevo

Direktor
Mr. Dino Šehović, s. r.

(SI-372/24-K)

KANTONALNI ZAVOD ZA PRUŽANJE BESPLATNE PRAVNE POMOĆI

Na osnovu člana 66. stav 1. i 2. Zakona o organizaciji organa uprave u Federaciji BiH ("Službene novine Federacije BiH", broj 35/05) a u vezi sa članom 38. Zakona o plaćama i naknadama u organima vlasti Kantona Sarajevo ("Službene novine Kantona Sarajevo", br. 5/19 i 40/22) i člana 112. stav 1. Kolektivnog ugovora za državne službenike i namještenike u organima državne službe Kantona Sarajevo ("Službene novine Kantona Sarajevo", broj 51/23) direktorica Kantonalnog zavoda

za pružanje besplatne pravne pomoći, uz pribavljeno mišljenje Ministarstva finansija Kantona Sarajevo i Sindikata, donosi

**PRAVILNIK
O IZMJENAMA PRAVILNIKA O PLAĆAMA I
NAKNADAMA IMENOVANOG LICA, DRŽAVNIH
SLUŽBENIKA I NAMJEŠTENIKA KANTONALNOG
ZAVODA ZA PRUŽANJE BESPLATNE PRAVNE
POMOĆI**

Član 1.

U Pravilniku o plaćama i naknadama imenovanog lica, državnih službenika i namještenika Kantonalnog zavoda za pružanje besplatne pravne pomoći ("Službene novine Kantona Sarajevo", broj 52/22) u članu 12. stav (1) mijenja se i glasi:

- (1) Dio plaće koji pripada državnom službeniku i namješteniku po osnovu ocjene rada utvrđuje se kako slijedi:
- za ocjenu "izuzetno uspješan" / "naročito uspješan" 5% od osnovne plaće, a za ocjenu "uspješan" 2% od osnovne plaće.

Član 2.

U članu 31. stav (1) riječ "pet" zamjenjuje se riječi "šest".

Član 3.

Ovaj Pravilnik stupa na snagu narednog dana od dana donošenja, a objaviće se u "Službenim novinama Kantona Sarajevo".

Broj 28-01-02-15/2024

09. februara 2024. godine
Sarajevo

Direktorica

Emina Herdić-Haračić, s. r.
(SI-364/24-K)

**JAVNA USTANOVA "MEMORIJALNI CENTAR
SARAJEVO"**

Na osnovu člana 27. stav 1. alineja 1. i čl. 37. i 38. Zakona o ustanovama ("Službene novine RBiH", br. 6/92, 8/93 i 13/94), čl. 6, 19 i 23. Odluke o osnivanju Javne ustanove "Memorijalni centar Sarajevo" ("Službene novine Kantona Sarajevo", broj 45/23), Upravni odbor na sjednici održanoj 02.11.2023. godine, donosi

PRAVILA

**JAVNE USTANOVE "MEMORIJALNI CENTAR
SARAJEVO"**

I. OSNOVNE ODREDBE

Član 1.

(Javna ustanova)

Javna ustanova "Memorijalni centar Sarajevo" (u daljnjem tekstu: Memorijalni centar Sarajevo) je samostalna javna ustanova u državnom vlasništvu koja u oblastima kulture, naučnoistraživačkog rada, obrazovanja, arhivskog i muzejskog djelovanja, bibliotekarstva i boračkoj oblasti trajno obavlja djelatnost od posebnog društvenog interesa.

Član 2.

(Predmet)

- (1) Pravilima Memorijalnog centra Sarajevo (u daljnjem tekstu: Pravila) regulišu se odredbe o: nazivu i sjedištu Memorijalnog centra Sarajevo; pečatu i štambilju; osnivaču Memorijalnog centra Sarajevo; obavezama Memorijalnog centra Sarajevo prema osnivaču; djelatnosti Memorijalnog centra Sarajevo; načinu raspoređivanja sredstava za rad; načinu donošenja i usvajanja programa rada i finansijskog plana; načinu usvajanja godišnjeg izvještaja o radu i finansijskog izvještaja; organima upravljanja, rukovođenja i kontrole koji se obrazuju u Memorijalnom centru Sarajevo; načinu imenovanja, trajanju mandata članova tih organa, njihovim pravima, obavezama i odgovornostima; licima

ovlaštenim da, pored direktora, zastupaju Memorijalni centar Sarajevo i njihovim ovlaštenjima i odgovornostima; sufinansiranju pripreme, izdavanja, otkupa i promocije publikacija, audio i video zapisa, knjiga i naučnih radova iz perioda odbrambeno-oslobodilačkog rata 1992-1995 i narodno-oslobodilačkog rata 1941-1945; prioritetima za sufinansiranje izgradnje spomen-obilježja i rekonstrukcije postojećih spomen-obilježja iz perioda odbrambeno-oslobodilačkog rata 1992-1995 i narodno-oslobodilačkog rata 1941-1945; nadzoru nad zakonitošću rada Memorijalnog centra Sarajevo; općim aktima koji se donose u Memorijalnom centru Sarajevo i načinu njihovog donošenja; radnim odnosima, načinu ostvarivanja javnosti rada; statusnim promjenama; kao i druge odredbe od značaja za rad Memorijalnog centra Sarajevo i ostvarivanja prava, obaveza i odgovornosti radnika Memorijalnog centra Sarajevo.

- (2) Na osnovu Pravila i u skladu sa njenim odredbama pojedini unutrašnji odnosi u Memorijalnom centru Sarajevo uređuju se drugim općim aktima.

Član 3.

(Osnivač)

Osnivač Memorijalnog centra Sarajevo je Skupština Kantona Sarajevo (u daljnjem tekstu: Osnivač).

Član 4.

(Organizacione jedinice)

- (1) Memorijalni centar Sarajevo predstavlja organizacionu cjelinu čije se funkcionisanje i rad odvija u Javnoj ustanovi kao cjelini.
- (2) Poslovi koji proizlaze iz djelatnosti i registracije Memorijalnog centra Sarajevo, Memorijalni centar Sarajevo obavlja putem izvan organizacione jedinice - kabinet direktora i organizacionih jedinica.
- (3) Unutrašnja organizacija, broj zaposlenika kao i sistematizacija poslova Memorijalnog centra Sarajevo pobliže se definiše i uređuje Pravilnikom o unutrašnjoj organizaciji i sistematizaciji. Pravilnik o unutrašnjoj organizaciji i sistematizaciji poslova Memorijalnog centra Sarajevo donosi Upravni odbor na prijedlog direktora, uz obaveznu prethodnu saglasnost Vlade Kantona Sarajevo.

Član 5.

(Prava osnivača)

- (1) Prava Osnivača prema Memorijalnom centru Sarajevo vrši Kanton Sarajevo.
- (2) Prava Osnivača ostvaruju se putem Vlade Kantona Sarajevo (u daljnjem tekstu: Vlada), u skladu sa Ustavom Kantona Sarajevo, Zakonom o ustanovama i drugim pozitivnim zakonskim propisima, Odlukom o osnivanju Javne ustanove "Memorijalni centar Sarajevo" (u daljnjem tekstu: Osnivački akt) i položajem Memorijalnog centra Sarajevo kao javne ustanove u državnom vlasništvu.

Član 6.

(Upis u sudski registar)

Memorijalni centar Sarajevo ima svojstvo pravnog lica i upisuje se u sudski registar kod nadležnog suda u Sarajevu.

II. NAZIV I SJEDIŠTE

Član 7.

(Naziv i sjedište)

- (1) Memorijalni centar posluje pod nazivom Javna ustanova "Memorijalni centar Sarajevo".
- (2) Skraćeni naziv je Memorijalni centar Sarajevo.
- (3) Sjedište Memorijalnog centra Sarajevo je u Sarajevu, ulica Širokac 22, 71.000 Sarajevo, Bosna i Hercegovina.